

Date – 01/03/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Ram chung hmun dangte rualin Health minister Pi Lalrinpui-i'n chhul hmawr cancer venna damdawi a thlawna sem beihpui thlak chu Mizorama kalpui turin Aizawlah a hawng.
2. Tourism Minister Pu Lalnghinglova Hmar chuan Aizawl khawpui leh a chhehvel a khualzinte tlawh thin hmun cheithat tura ruahmante a tlawh.
3. Chief Minister Pu Lalduhoma chuan Unnati Scheme hnuaiia a fapain loan puk a tum chu dik lohna a awm lo a ti.
4. Iran leh Israel inkar boruak a sosan zel avangin ram chungah thlawhna 444 chu vawiin hian thlawhtir a ni dawn lo.



HPV

Ram pum huapa hmeichhe naupang kum 14 tling tawhte tana chhul cancer laka invenna damdawi Human Papillomavirus (HPV) pek beihpui thlak tan a ni.

Nimin khan Rajasthan-a Ajmer-ah Prime Minister Narendra Modi-a'n a hawng a, a bul tan nan hmeichhe naupang 5 hnenah HPV vaccine pek a ni. Pu Modi-a chuan hmeichhiate harsatna te ber thlenga chinfel dan ngaihtuah chu BJP sorkar thil ngaihpawimawh hmasak zingah a tel thu sawiin hemi kawnga hmalakna pawimawh pakhat chu HPV vaccine pek beihpui hi a ni, a ti a, he campaign hi ramchhunga hmeichhiate tihchakna tur hmanrua zinga a tel thu a sawi bawk.

Mizoramah pawh Health minister Pi Lalrinpuii hovin Aizawl Civil Hospital Aizawl Auditorium-ah Prime Minister programme hi video conferencing hmangin sorkar hotute, sikul hrang hranga kum 14-15 inkar zirlai hmeichhiate leh nu leh paten an chhim a ni.

Health minister Pi Lalrinpuii chuan chhul hmawr cancer venna damdawi a thlawna sem beihpui thlakna chu Mizorama kalpui turin Civil Hospital Aizawlah a hawng ve nghal a; Mizoram hi mihring cheng zat atanga teha India rama cancer vei tam berna a nih thu sawiin, hei hi a vei thu leh mithiamte zirchianna hrang hrang a chhiar nasat thu te, Mizorama cancer thlentu tam ber chu sarep ei nasat leh vaihhlo zuk leh hmuam tih nasat vang nia mithiamten an hmuh chhuah thu a sawi.

Pi Lalrinpuii chuan chhul hmawr cancer venna damdawi, HPV vaccine hi khawvel ram 160-ah hman a nih tawh thu sawiin, Mizorama sorkar damdawiin hrang hrang atangin a thlawnin pekchhuah a nih dawn thu a sawi bawk.

Ram chhung hmun dang rual hian Lunglei District-ah pawh chhul hmawr cancer thlentu Human Papillomavirus (HPV) laka invenna pek runpui chu kalpui tan a ni.

Lunglei District tana HPV vaccine pek runpui hawnna chu Sub-Divisional Officer (Sadar) Pi TT Beikhaizi hovin Urban Primary Health Centre (UPHC), Sazaikawn, Lungleiah buatsaih a ni a. Pi TT Beikhaizi chuan tihdam aiin inven a tha zawk tih hriaa HPV vaccine la thei zawng zawngin lak tum vek turin a chah a. Sawrkarin mipui hriselna atana sum leh tha tam tak senga hma lakna a kalpui chu mipuite'n hlut thiam a, chhawr tangkai a pawimawh thu sawiin, thawktute pawh kim taka vaccine pe thei tura theih tawp chhuah turin a chah a. Hmeichhia kum 30–65 inkar HPV hri venna la lote tan pawh mahni dinhmun hre chiang tura hunbi neia inentir thin a that thu sawiin, hriselna ngai pawimawh turin kal khawmte a chah.

Urban PHC Sazaikawna hun hman hi Lunglei District Immunisation Officer Dr Christina Zonunmawii'n kaihruiin, HPV hri venna pek runpui kalpui dan tur tlangpui a sawi fiah a. Lunglei District Senior Chief Medical Officer Dr Lalrinthangi chuan lawm thu sawiin, chawhnu dar 1:00 atangin HPV hri venna hi pek tan a ni a. Lunglei District-ah chuan Sub-Divisional Hospital 1 (Tlabung), UPHC 2 (Sazaikawn leh Hrangchalkawn) leh PHC 5 (Buarpui, Bunglei, Haulawng, Lungsen leh Tawipui South)-ah te HPV hri venna hi pek a ni. Lunglei District-ah chuan HPV Vaccine pek tur tinzawn (target) tleirawl 1,385 an awm.

<><><>

UNNATI LOAN – CM

Chief Minister Pu Lalduhoma chuan Unnati Scheme hnuai a fapain loan puk a tum chu dik lohna a awm lo a ti.

Pu Lalduhoma hian Champhai North bialtu MLA Pu H. Ginzalala private resolution putluh 'ZPM Sokarin Mizoram tana a hnathawhte hi a lawmawm kan ti' tih sawihonaah Unnati Scheme hnuai a loan puk chungchang hi a sawichhuak a ni.

Chief Minister chuan loan an puk tur zat atanga an lakchhuah chin zelah a pung an pek mai dawn thu sawiin, nakinah heti zat zat hi puk a tul lo an tih chuan an la rek bung thei a, hei aia tam hi puk teh ang an tih pawhin an la dil pung thei a. Chu chu a kalhmang a ni, a ti a; Chawlhmunana an in sak hna chu inthlan hma daih atanga an bultan tawh a nih thu leh tunah hian MLA pawh ni lo mahse, an tih dawn tho thu a sawi bawh.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ROPUILIANI WOMEN FARMER

Champhai District, Khawbung khuaa Ropuiliani Women Farmer Producer Company Limited chuan tunkar chhung khan Khawbung RD Block huam chhunga

hmarcha awm ang ang te dap khawmin ni 2 kalta chhung khan Khawbung atanga phurh chhuah a ni.

Ropuiliani Women Farmer Producer Company Limited, Mizoram State Rural Livelihoods Mission (MzSRLM) hnuai ami niin, Mahila Kisan Sashaktikaran Pariyojana (MKSP) Value Chain Project hmalakna peng pakhat a ni bawk. Khawbunga Crop Procurement Manager Pu R. Lalthianghlina chuan an hmarcha lak tur te chu a tha leh tha thliar hran tir vek a nih thu a sawi a. Hmarcha rah sen tha, a kuang tel lova an thlan khawm sa chu Kg 1 Rs. 350 zela an lak thu a sawi. Hmarcha lak loh a hnunawi an khawm leh te hi Metric Ton 4 chuang a la tlin thu a sawi bawk a ni.

<><><>

TOURISM MINISTER

Minister of State Pu Lalnghinglova Hmar Tourism Department changtu chuan Aizawl leh a chhehvel - Sakawrhmutuai tlang, Durtlang North, Sakeikhawthlir (Durtlang), Muthi leh Laipuitlang-a tourism hmun cheithat tura ruahmante nimin khan a tlawh a, khawtlang hruaitute nen inkawmin hmalak dan tur ruahmanna an siam.

Pu Lalnghinglova Hmar chuan Mizoram hmun hrang hranga tourist hmun nei tha hmun engemawzatte chu cheitha a, tichangtlun turin ruahmanna a awm tih a sawi a. Sawrkarin a cheithat dan turah ruahman sa deuh nei mah se, a hrechiangtu khawtlang hruaitute rawtna leh duhdante ngaithla a, a tha thei ang ber nei tura remruat ho turin hmalak an duh a ti a, hmunhmate chu khuarel mawina tichhe lo thei ang bera cheithat tum a nih thu a sawi bawk.

Minister chuan hmasawna ruhrel sak engemawzatah, a enkawl leh hman dan turah ruahmanna a awm tha tawh lo a, chuvangin infrastructure tha tak tak pawh enkawltu mumal awm lova tawh chhia a awm thin tih a sawi a. Tuna an project turah hi chuan a sak lai leh enkawl chhonzawm kawngah khawtlang nen tha taka thawhho an duh a, ziaka inremna mumal tak neih hmasak an duh a ni” a ti.

Mizorama tourist site cheithatna tur hian SASCI Part-II, 2025-2026 hnuai ah ‘Development of Tourist facilities & attractions to Global Scale in the state of Mizoram’ ah cheng vaibelchhe 250 hmuh tawh a ni a. Hemi hnuai ah hian zinmite tlawh thin hmun hrang hranga hmasawna ruhrel siam bakah tourist lodge pawimawh bik cheithat te, wildlife sanctuary beh chhana wildlife tourism kalpui te, water sports adventure hmun tur siam te, paragliding thlawhna tur siamte a tel.

<><><>

BJP

BJP Mizoram State Joint Treasurer Pi Lalremsangi Fanai leh BJP Mamit District hruaitute’n Mamit Division hnuai kawng siam mek chungchangah PWD EE Pu Lalngaisanga hmuin, Mamit khawchhung kawng siam mek nana pawisa hmuh ang ang daihzai taka hman tum a nih thu a lo hrih a. Mamit leh Sihthiang inbkar te, Mamit leh Damparengpui inkar te, Silsury leh Pukzing Vengthar inkar te siam tura hmalak mek a nih thu a sawi bawk a, hemi chungchang hi BJP Mamit District hruaitu ten Central Minister, Durgadas Uikey an Mamit a tlawh tum a an lo thlen niin, Ministry of Road Transport & Highway ah pawh ziak a an thlen tawh a ni

a, State hruaitu te nen an bawhzuina kal zel a hlawhtlinna hmuh a ni dawn ta a ni an ti

BJP hruaitute hian Mamit kawng siamtu Company, Sumati Infrastructure Pvt Limited Project Manager Amit Prasad pawh hmu in, Aizawl atanga Mamit luh dawn a, an hnathawh mek na ah mipui thawhtheih chi hna awm te pawh Tualchhung mi te duhsak chung a tha taka hnathawh mek a nih thu BJP hruaitu te a lo hrilh chu a lawmawm hle a ni a ti.

Pi Lalremsangi chuan, Lengte peng pelh atanga Mamit kawng siamna tur National Highway office in an tender mek ah, tha taka hnathawh thei tur sorkar in a thlan ngei an beisei a ti a. BJP Mizoram chuan Aspirational district ni mek Mamit District ah hmasawna chak taka a kal theih nan an ngaihven reng dawn a ni a ti bawk.

<><><>

MPCC

Congress Party Thalai, MPYCC chuan Assembly a “The Mizo Marriage and Heritance of Property Ammendment bill (2026)” a sawi hawnaah Chief Minister chuan Mizo hmeichhia, nu leh pa leh an chungte rilru a hliam na hle an ti a. He a thusawi hian Constitution-a Fundamental Rights Article 14, 15 leh 21 te a kalh a ni an ti.

Chief Minister chuan mawhphurhna la ngam lo a nih zia lantiron Civil Society leh he Bill draft Review Committee tih anga he bill hi pu lut ah insawiin a pha kual leh bawk a ni an ti a, ZPM Chief Minister leh ZPM sorkar kalphung chu Congress Thalai chuan hmalakna tha lo leh mahni thu zuk ching an nihzia leh midang puh kual mawhphurhna la ngam lo, lal duh hrim hrim sorkar an nihzia a nemnghet ah a ngai an ti a ni.

<><><>

FLIGHTS CANCEL

Iran leh Israel inkar boruak a sosan zel avangin ram chhungah thlawhna 444 chu vawiin hian thlawhtir a ni dawn lo. Civil Aviation Ministry chuan social media kaltlangin he thu hi a puang a. Directorate General of Civil Aviation (DGCA) leh Airlines hrang hrangte indawrna-ah zinmite himna leh thlawhna kal dan phung inkaihruaina dung zui a thiltih a nih thu an sawi a. Iran leh Middle East tam chung a thlawk thlawhna 410 chu niman khan cancel a lo ni tawh a, vawiin hian thlawhna 444 cancel tura rin a ni. Zin turte chu thlawhna tumhmun an pan hma-in an thlawhna dinhmun ngaihven tura thurawn pek an ni.

Civil Aviation Ministry chuan thlawhna tumhmun liante chu an thlawhna thlawhtir dan tur ngaihven reng turin a hriattir a. Passenger Assistance Control Room chuan zin tumte dinhmun uluk taka vilin an harsatnate a theih chin china chinfelsak turin ruahmanna a siam a ni.

<><><>